

18. maaji 2017

Inatsisartut suleriaasianni § 36 naapertorlugu matumuuna apeqquteqaat aallaavigalugu oqallinnis-samik siunnersuut saqqummiuppara:

Innarluutillit najugaqaqatigiiffiini naleqquttumik najugaqartinneqarnissaminnut pisinnaati-taaffiannut FN-ip Innarluutillit pillugit Isumaqaqatigiissutaanut naapertuuttumik innarluutillit qanoq ittunik sinaakkusikkanik avatangiiseqartinneqartariaqarnersut pillugu apeqquteqaat aallaavigalugu Inatsisartut oqallinnissaannik siunnersuut

(Inatsisartunut ilaasortaq Martha Lund Olsen, Siumut)

Tunngavilersuut:

Ullumikkut naliginnaalersimavoq innuttaasut annertusisamik innarluuteqartut, innarluutillit najuga-qaqatigiiffianni imaluunniit innarluutillit inissiaataanni, arlalitsigut ineeraaqqani najugaqartitaasar-mata, ilaatigut 10m² ataallugu angissusilinni namminerisamik anartarfeqaratillu uffarfeqanngitsuni. Inissiaq ataatsimoorussa q ilaanni pingasuullutik imaluunniit sisamaallutik avillugu najugarikkajut-tarpaat inissiani sisamanik imaluunniit tallimanik initalinni, saniatigut sulisut inissaqartitaasarlutik.

Innarluutillit ineeraaqqani uffarfeqaratillu anartarfeqanngitsuni najugaqartut inuunerminni ukiut 30-40 najugaqarsinnaasarput, sapilernissartillu tikikkaangamikku utoqqaat illuannut imaluunniit ulloq unnuarlu paaqqinniffimmut nuuttariaqalersarput.

Naalagaaffiit Peqatigiivisa Innarluutillit pillugit Isumaqaqatigiissut pappialatigut nunatsinni atuuppoq, piviusumilu taamaangilaq.

Isumaginninnermut tunngasumik Naalakkersuisoq, kommunalbestyrelsemut ilaasortat peqatigalugit siorna januarimi isumassarsiuutigalutik Danmarkimiipput, ilaatigut kalaaleqativut innarluutertik pequtigalugu Danmarkimut aallartinneqarsimasut inuunerminni qanoq sinaakkusersorneqarsima-nersut takuavut.

Innarluutillit najugaqaqatigiiffiat takuarput, tassanilu najugartut namminerisamik mikisunnguanik iniuteqarput ataatsimoortarfeqarlutillu, tassanilu sulisut inissisimapput najugaqartullu igaffiat, ataatsimoortumillu katersuiffiusarluni.

Oqaluttuamik attortinnangaartumik tusartinneqarpugut kalaaleqaterput 1960`-ikkunniit paaqqin-niffimmiilersimasoq qanoq qisuariarsimanersoq najugaqarfimmi ataatsimoorfiusumi namminerisa-minik initaarmat, aneerasaartarfittalimmik. Kiffaanngissuseqarluni inuunini oqartussaaffigilermagu assut pilluaatigisimallugu, aalajangersinnaangorsimavaami kisimiilluni angerlarsimaannarusun-nerluni, pujortarusunnerluni imaluunniit aneerasaartarfimmeerusaarniarnarluni. Inuunermi pitsaassusaanut qaffatsitsingaatiarsimavoq kiisami – innuttaasut allat assigalugit – nam-minerisaminikk ineqalernini oqartussaaffigisinnaasaminik.

Taamaattumik isumaqarpunga pissusissamisoortoq, innuttaasut innarluutillit atugassarititaat pitsanngorsassagutsigik. DR-ikkut aallakaatitaq tarnikkut ineriartornerminni innarluutillit pillugit takusimagussiuk maluginiagassaavoq innarluutillit qanoq aamma inuuneritsigisinnaasut, inuunermi atugassarititaasut eqqortut atortinneqarpata.

Inissianik naleqquttunik sanaartornikkut inuuneq pitsaasoq namminerisamik inigisami atortikkaanni innarluutilittatta inuunerissaarnissaanut annertuumik sunniuteqassaaq, namminerisamik inissiaqaa-tigalutik aamma ataatsimoorussiffiusinnaasumik ineqarluni.

Inatsisartut Naalagaaffiit Peqatigiivisa Innarluutillit Pillugit Isumaqatigiissutaat akuerereernikuuat, taavami pissusissamisuunngila innarluutilinnut aaqqissuulluakkanik najugaqarfissanik neqeroorsin-naanngorutta? Taamatutaaq pissusissamisuunngila innarluutilinnut najukkanik ataatsimoorfis-saannik pitsaasunik neqeroorsinnaanngorutta?

Inatsisartut kinguneqartussamik isumaliulernissaat aammalu oqallilluarnissaannik kissaappakka.